

Pignols da Nadal ecologics creschan en la vischinanza

Varga 1 milliun pignols da Nadal vegnan vendids mintg'onn en Svizra. Bunamain 60% da quests pignols èn importads da l'exteriur. Empè da cumprar in pignol ch'è vegnì transportà sur tschients kilometers fin en nossas butias, pon ins er cumprar in pignol da Nadal indigen cun ina buna bilantscha da CO₂.

MARTIN GABRIEL/FMR

Ina planta da dascharina absorbescha circa 18 kilos CO₂ en ils 10 onns. Tants onns dovra in pignol davent da sia plantascha fin ch'el è in pignol da Nadal madir. Cun crescer producescha mintga pignol oxigen e filtrescha particlas da pulvra or da l'aria. Cun dismetter il pignol turna il CO₂ ch'il pignol aveva absorbà cun crescer puspè en l'atmosfera.

Tgenin è il pignol Green Deal?

Per il selvicultur chantunal e manader da l'Uffizi chantunal da guaud e privels da la natira *Urban Maissen*, datti pliras pussaivladads da vegnir tar in pignol da Nadal che ha ina buna bilantscha ecologica. «Ina buna letga è da prender in pignol or da las ognas. En las cuntradas alluvialas èn las plantas da dascharina en il fauss lieu or dal pugn da vista ecologic.» In'otra pussaivladad è tenor Urban Maissen, da pinar in pignol che creschia sin la prada. Là vegnian bleras plantas pinadas pervia dals basegns da l'agricultura. Il manader da l'Uffizi chantunal da guaud cussegli dentant er fitg las plantas en las crias. Quai èn damai ils pignols en ils vaschs cun terratsch. «Quels pignols vivs pon ins duvrar mintg'onn puspè», di Urban Maissen, «ultra da quai pon ins era prender a fit in pignol da Nadal en ina cria.»

Era l'organisasiun tetgala da l'economia da guaud e da laina «Grischun lain» appellescha a la cumpra da pignols favuraivels al clima. Quai en in artigel ch'è publitgà sin la pagina d'internet da Grischun lain. Grischun lain suttas-tritga ils cussegls dal selvicultur chantunal. Ch'i dettia avunda pussaivladads da racoltar pignols da Nadal en nossas regiuns dal Grischun senza stuair guntgir ad alternativass.

Pignols importads

Ils pignols da Nadal da l'exteriur absorbeschan tuttina bler CO₂ sco noss pignols indigens durant ch'els creschan. Il problem da quels pignols è tenor Grischun lain la uschenunada energia grischina che vegn duvrada per la produziun, per il transport e per la dismessa sco era il surpli d'emissiuns da CO₂. Ils blers pignols importads derivian dal Danemarc, da la Germania ubain er da l'Ollanda. Savens vegnian quels pignols pinads ditg avant l'advent e stoppian silsunter vegnir deponids transitoricamain en locals da frestgera che dovrian fitg blera energia. Er Urban Maissen, il selvicultur chantunal e manader da l'Uffizi chantunal per guaud e privels da la natira ha ditg a la FMR, ch'il pignol ecologic saja quel che na stoppia vegnir transportà da terras lontanass en fin en il Grischun. «Betg adattadas per la rolla da pignol da Nadal èn tenor mai plantas producidas cun pesticids e cultim artificial en plantaschas da pignols. Sch'il pignol vegn transportà da lunsch fin tar nus, èn ils fastizs dal CO₂ naturalmain pli gronds pervia dal lung viadi.»

Pignols da plastic

Grischun lain scriva che tenor retschertgas d'opiniuns sajan pignols da Nadal da plastic anc adina en il trend. Blers cumpran in pignol da plastic ch'ins possia deponer durant l'onn e puspè duvrar il proxim Nadal. In pignol da

plastic possia esser favuraivel a l'ambient, sch'el vegnia duvrà plirs onns. Grischun lain sa basa ad in studi da l'Australia che pretenda ch'in pignol da plastic stoppia vegnir duvrà 17 onns per cuntanscher la bilantscha ecologica d'in pignol da Nadal natural. Pignols da plastic vegnian normalmain producids en terras fitg lontanass. Gia il transport da quels pignols dovria tschients liters benzina. E cunquai che quels pignols vegnian fatgs or da materias fossilass creschianils ils donnss pervia dal CO₂ supplementarmain.



FOTO YANIK BUERKLI